

也此特其小者耳大者長丈餘有兩手似蝦蟆而無後足海濱常
見之

異獸

海鹽俞漢乘名雲來令江西之湖口邑多虎患有貢生家在兩山
之中夜忽聞一物墜其屋上梁瓦俱裂次早視之見異獸墜兩櫃
間而死羊頭羊蹄牛身馬尾不知何怪康熙丁巳年事

異魚

俞漢乘在湖口漁者獲一魚重斤許魚頭鼠身云鼠入水所化亦

丁巳年事

人魚

康熙乙亥春平湖乍浦海濱獲一物如人頭面五官四肢全具女

形兩乳無別腹白如魚背下有鬣無髮長五六尺一二日而斃兩年前海鹽獲一物形正同僅長尺餘蓋人魚也史記始皇塚中以人魚為膏代漆燈豈是物歟

鯨魚腹鉢

嘉善武進士陳玉明為松江金山衛守備海中獲鯨魚重千斤剖之腹有石鉢蓋魚吞僧而鉢不化也康熙初年事

怪異

長洲人小文卿言其母為收生姬至一產家其婦產一怪物龜蛇併體蜿蜒能動姬持刀砍殺之即時戰慄得病不久而死康熙十四年事也且云其母曾見產三目者頭中空如臼者手出於背者皆不育如此者慮恒有之